

## **DEKLARASAUN POLÍTICA: “POZISAUN VOTA KONTRA BANKADA CNRT BA PROPOSTA LEI ORSAMENTU JERÁL ESTADU 2020 IHA FINAL GLOBÁL”**

Díli, 08 de outubro de 2020

Povu doben Timor-Leste,

Hafoin diskusaun Proposta Lei OJE 2020 iha jeneralidade to’o mai iha espezialidade durante loron 6 nia laran, Bankada CNRT ikus mai hakarak hato’o nia pozisaun loloos kona-ba Orsamentu Jerál Estadu 2020 nian.

Pozisaun Bankada CNRT nian ne’e bazeia ba situasaun sira mak hanesan tuir mai ne’e:

1. Bankada CNRT hakarak re-afirma ninia pozisaun atu defende Konstituisaun-da-República no Estadu Direitu Demokrátiku, iha ne’ebé Estadu tenke hakru’uk no obedese ba Konstituisaun núdar ai-riin ba konstrusaun Estadu nian. CNRT Lakohi husik hela presedente ne’ebé LADI’AK ba Jerasaun Futuru nian atu Banati tuir, se lae, Timor-Leste sei LAIHA FUTURU.
2. Bankada CNRT konsidera Ezisténsia VIII Governu de Faktu no Parlamentu Nasionál V Lejizlatura ne’e KADUKA tiha ona tuir artígu 86, alínea f, Konstituisaun-da-República. Tuir loloos Prezidente-República Dissolve ona Parlamentu Nasionál tuir prazu loron neen-nulu ne’ebé hakerek iha Konstituisaun-da-República Artígu 86 alínea f, sura husi loron 18 Janeiru to’o 17 Marsu 2020.
3. Bankada CNRT afirma liután nia pozisaun katak VIII Governu ne’ebé moris la-tuir Konstituisaun-da-República LAIHA Lejitimidade Konstitusionál atu apresenta Kualkér Proposta Lei Orsamentu ba Parlamentu Nasionál. Alein-de ne’e laiha lejitimidade konstitusionál, VIII Governu mós laiha intensaun atu defende Kadoras Greater Sunrise mai Timor-Leste.
4. Bankada CNRT konsidera Meja Parlamentu Ilegál halo diskriminasaun lidera plenária, tanba buka halakon direitu deputadus CNRT nian hodi halo intervensaun no pedidu esklaresimentu, nune’e diskusaun Proposta Lei OJE 2020 la tasak didiak, ansi no lufu-lafu de’it.
5. VIII Governu de Faktu ninia kapasidade fraku iha ezekusaun OJE 2020 tanba atinje de’it 48.4 porsentu no sei iha saldu Millaun \$690,27 de dolares, maibé Governu hakarak dada hotu osan husi Fundu Petrolíferu. Tuir loloos ita husik osan hirak ne’e hodi investe iha merkadu finanseira, nune’e sei fó-retornu ba Konta Fundu Petrolíferu, liu-liu iha situasaun ne’ebé ita sei depende hela ba Fundu soberanu ida-ne’e.
6. CNRT teknikamente kontribui ona atu hadi’ak Orsamentu Jerál Estadu no hare’e katak VIII Governu de Faktu ida-ne’e sei labele ezekuta orsamentu durante período fulan-rua nia laran. CNRT VOTA KONTRA iha final globál tanba lakohi atu Kontribui ba hahalok gasta osan arbiru ne’ebé Governu de Faktu ida-ne’e sei komete.

Ho pontu sira iha leten ne’e maka Bankada CNRT afirma nia pozisaun katak:

- La-Admite VIII Governu ne’ebé laiha Lejitimidade Konstitusionál atu apresenta Orsamentu Jerál Estadu.

- CNRT mós hakarak AFIRMA katak sei La-Admite Ezisténsia VIII Governu ne’ebé Moris husi Violasaun ba Konstituisaun no Konsolida liuhosi Hahalok Asaltu Podér iha Parlamentu Nasionál.

Tanba-ne’e, Povu doben Timor-Leste, Bankada CNRT la-fó votos favoravel ba Proposta de Lei OJE 2020.

Ho CNRT nia pozisaun vota konta final globál, CNRT Ezije ba Tribunal Rekursu atu Pronúnsia Konstitusionalidade no Legalidade husi Orsamentu Jerál Estadu 2020 ida-ne’e.

Povu doben Timor-Leste, maski CNRT VOTA KONTRA Proposta Lei OJE 2020 maibé ami sei kontinua akompaña ezekusaun osan ne’e, tanba osan hirak ne’e mai husi povu, no na’in loloos mak povu.

Fiar Án La’o Ba Oin – FALBO!

Obrigado.

Presidente da Bancada CNRT, Duarte Nunes